

Ernesto Enrique Rosenstand(1931-2016):

Un monumento den literatura Arubiano

Ernesto Enrique Rosenstand a nace dia 4 di maart 1931 na Santa Martha (Colombia) y a emigra na 1942 durante e Segundo Guerra Mundial pa Aruba.

Hunto cu su mayornan nan a biba den e caya Laurens Costerstraat di e bario di Companashi, net pazuid di e veld di RCA. Como hoben di 10 aña Ernesto a sa di asimila cu e hobennan di su edad y siña papia e papiamento. Despues di a sigui un estudio pa obtene su LO-akte como maestro di scol, el a cera conoci cu e mundo di literatura. Banda di su ofishi como maestro di scol durando les di Spaño, e tabata activo desde añanan '50 riba tereno cultural.

Carera literario

Rosenstand su carera literario a cuminsa den decada na final di añanan '50, ora cu e tabata skirbi storianan pa mucha y esakinan tabata ser transmiti den e programa 'Ora Infantil' di Radio Kelkboom. No a tarda mucho cu Rosenstand a debuta como escritor den e bida literario limita cu tabata existi e tempo ey na Aruba. Limita den e sentido cu ta un pipita di autor ta tin, kende tabata publica nan obranan. Asina su prome obra literario Cuentanan Rubiano (1961) a mira luz y dunando balor na e idioma Papiamento.

Mester accentua akinan cu den e periodo di 1932-1960 e autornan na Aruba tabata skirbi na Hulandes, Ingles of Spaño. Esaki cu excepcion di e autor V.S. Piternella, kende solamente na 1955 a publica dos obra na papiamento: Dora Deana y Flornan di amor y e mesun aña a aparece riba mercado Dora Deana y su lagrimanan. Con tal cu den añanan '60 Rosenstand a duna un prome impulso na obranan literario na Papiamento, publicando dos volumen di storia cortico, titula: Nos ta topa na park (1963) y despues Cuentanan pa un y tur (1965). Den e decada di añanan '60 nos por observa tambe e entrada di autornan manera e.o. Hubert Booi y Henry Habibe cu obranan na Papiamento den e campo literario.

Revista

Cu binimento na aña 1968 di e revista cultural Watapana (1968-1972) na Hulanda, dirigi pa Henri Habibe, Ramon Todd Dandaré y Pedro

Velásquez, nos por observa un cambio di direccion cerca Ernesto Rosenstand. Den e periodo aki el a cuminsa publica algun di su obranan literario den e revista Watapana cu un circulacion bou di studentenan Arubiano y Antiano na Hulanda. Di e manera aki Rosenstand a busca un podium y alabes un mercado nobo. Rosenstand su poesianan no ta loke nan ta yama 'poesia comprometi', sino mas bien ta poesia cu ta trata e relacion entre muhe y homber, e lasonan amoroso of e bida cotidiano. Den e mesun rosea mester bisa cu no ta trata aki di simplemente di poesianan romantico, pero di tecnicanan cu e poeta ta uza pa na un manera subtil e construi un poesia. Un



di e tomonan di poesia cu a impresiona mi mas tanto ta Anhelos sin fin (1982). Esaki no solamente pa e contenido di e poesianan, pero mas bien pa e forma con e buki a keda edita. Un ehempel: Dia mi stima bo/lo mi n' bisa bo/lo mi laga bo/pa bo mes sinti/ku sin palabra amor por nase/ sigui krese/te floresé. A base di e temanan di su poesianan, facilmente por categorisa Rosenstand como un romantico. Sin embargo e textonan poetico cu a ser uza den su obranan teatral y musical ta diferente di tono, contenido y mensahe.

Literatura y identidad

Si na 1907 nos ta topa cu e prome poesia na papiamento - Atardi - di Fechi Beaujon, por asumi cu den añanan '60 un base firme a keda construi pa literatura na papiamento. Den añanan '70 por mira diferente poetanan nobo, manera e.o.: Frank Booi, Nydia Ecury, Mario Dijkhoff, Emilio Lopez, Tikoli y hasta Federico Oduber, ken-



denan tur a bay ta publicando na Papiamento. Remarcabel ta cu den su cuentanan cortico bo ta topa titulongan manera: Kibaima, Guadirikiri, Macuarima, Bucuti. Nombenan di bario cu tabata ser uza pa

docente di Spaño y compara cu su coleganan escritor - durante henter su bida a uza Papiamento como e idioma pa expresa su mes. Echo cu Ernesto tabata considera e idioma Papiamento como parti di su identidad nobo, ta cu nunca e no a bira miembro di Sociedad Bolivariana of asocia su mes cu e poetanan di e club aki. A pesar cu mayoria di su bukinan a ser publica den e ortografia etimologico, por deduci for di otro fuenteenan cu su preferencia tabata bay pa esun fonologico.

Teatro

Pareu cu su encargo den añanan '50 di skirbi storia pa radio, Ernesto a aporta na construi e bida teatral na Aruba. Den añanan '70 nos ta observa un otro cambio di orientacion di e autor: di storia/poesia pa obranan teatral. Den esaki Ernesto Rosenstand manera un visionario a ripara cu mester traha na e pilarnan di e comunidad nobo y pa medio di teatro. Aplicando e metodonan di e asina yama Teatro di e Oprimido di Augusto Boal, Ernesto Rosenstand a skirbi y produci diferente obra teatral e.o. Macuarima (1971), Wa-dirikiri (1975) y Kiko ta di nos (1982). Cu e obranan aki e kier a pone un spiel dilanti e comunidad y pa cada ken puntra nan mes: Ken nos ta, unda nos ta para actualmente y ki rumbo nos ke scohe pa cana ariba? No solamente el a uza nombenan di sitionan conoci - esta Macuarima, Kibaima, Bucuti y e grot di Guadirikiri, cu e publico por identifica nan mes cu ne, pero cu e tercer obra a opta pa e individuo examina su consenchi. Den esaki no ta nada straño cu debi na e tema y enfoke den su poesianan y obranan teatral, tabata categorisa Rosenstand bou di e coriente di Indianismo. E coriente di In-

Skirbi pa: Quito Nicolaas

dianismo - den mi concepto - mester ser considera como un reaccion riba e coriente Africanismo di Corsou. Na final di e decada '70 (1978) el a dicidi na cuminsa cu su propio grupo di teatro Teatro Experimental Arubano, pa cual el a produci varios obra, di cual esnan mas conoci ta. e.o. Alameda (1978), Pa nan, por ta nan (1979) y Ban plasa pa sa! (1983).

Cronica/ Columna

Ernesto Rosenstand lo bay den historia y keda recorda pa su buki 'Companashi, Cronica di recuerdonan scondi' (2005). Un obra den cual e lector ta haya un bon bista di e bario, su habitantenan, su historia y e ritualnan di bida. Asina Rosenstand por conta masha largo mes over e tempo di Guerra, con e famianan a experencia esaki. Pero tambe con un grupo di mucha cu nan travesura tabata hunga futbol den dia y anochi. Te ainda ta e autornan Ernesto Rosenstand y Richard de Veer (†2013) cu su buki 'Un siglo di recuerdo' so a yega di skirbi un cronica den cual na un manera cronologico ta trata algun echonan memorabel y historico. Menos conoci ta e columnanan cu tabata aparece riba un base irregular den corant. E mesun cos nos por bisa di e buki Nos Cultura (2014) cu ta contene un compilacion di su rubrica cu el a publica durante 2006-2010 den e corant Bon Dia Aruba, cu ariba iniciativa di Nilda Koolman a mira Luz di dia.

Despedida

Ultimo añanan y sigur desde 2007 despues di a saca dos novelita pa hobennan, 'E soño di Wawa' (2006) y 'Wawa den mondi' (2007), por constata cu e produccion literario di Rosenstand a disminui considerablemente. Bunita por considera e iniciativa ora cu a dicidi di publica un Antologia, cu ta inclui mayoria di e obranan di Ernesto Rosenstand. Shinishi di olvido (2006) ta contene un coleccion di su poesianan, columnanan cortico, columnanan largo, cuenta cortico, obra teatral y algun discurso di e autor. Sin duda Ernesto Rosenstand a merece - pa su multiple publicacionnan y contribucion riba diferente tereno - un luga prominente den e historia di literatura di Aruba. □